



Број: 01,03,03/11,04/8-05-2-806/26

Сарајево: 25. 5. 2025.

**IZVJEŠTAJ**  
**SA SJEDNICE KOMITETA ZA EKONOMSKE I FINANSIJSKE POSLOVE,**  
**SOCIJALNE POSLOVE I OBRAZOVANJE**  
**PARLAMENTARNE SKUPŠTINE UNIJE ZA MEDITERAN**  
**Istanbul, 23. 5. 2026.**

Zamjenica predsjedavajućeg Delegacije Parlamentarne skupštine Bosne i Hercegovine (PSBiH) u Parlamentarnoj skupštini Unije za Mediteran (PSUZM) Rejhana Dervišević učestvovala je na zasjedanju Komiteta za ekonomske i finansijske poslove, socijalne poslove i obrazovanje PSUZM, koji je održan u Istanbulu 23. maja 2026.

Zasjedanju su prisustvovalе Jelena Rajaković, sekretar Delegacije, i Nataša Čabak, prevodilac.

Na sjednici Komiteta, koja je okupila predstavnike parlamenata država članica, zvaničnike Vlade Republike Turske, kao i eksperte iz oblasti međunarodnih odnosa i ekonomije, razmijenjena su mišljenja i stavovi o temi pod nazivom “Partnerstvo za stabilnost: ekonomska saradnja u Mediteranu kao put do mira”.

U obraćanju Rejhana Dervišević je ocijenila da se region Mediterana suočava s dubokim humanitarnim, ekonomskim i političkim izazovima. Upozoravajući na činjenicu da nova geopolitička stvarnost povećava nestabilnost, Dervišević je rekla da nejednakost i siromaštvo nastavljaju da rastu u mnogim zemljama, ostavljajući milione ranjivih na veoma ozbiljne ekonomske izazove i neizvjesnost.

Naglašavajući da se ne može govoriti samo o trgovini, rastu, ulaganjima, stabilnosti i prosperitetu dok nevini civili i djeca, posebno u području Gaze, trpe najteže i tragične posljedice, Dervišević je poručila da je u pojam stabilnosti i održivog napretka potrebno

ugraditi pitanja ljudskog dostojanstva, zaštite civila i jednake mogućnosti za sve. „Bez toga naša vizija mira bit će i ostat će nedovršena. Nema održivog napretka dok traje humanitarna katastrofa“, poručila je Dervišević.

Prema njenoj ocjeni, Mediteranu je potrebna nova vizija, ona koja se temelji na saradnji, solidarnosti i zajedničkoj odgovornosti. Ekonomska saradnja ne smije ostati apstraktni politički cilj, ona mora postati alat za smanjenje patnje, stvaranje prilika i vraćanje nade, rekla je Dervišević i dodala da to znači smanjivanje jaza između Sjevera i Juga, Istoka i Zapada i našeg regiona, na način da se osigura pomoć i obnova zajednicama koje se suočavaju s najdubljim očajem i nestabilnošću, kao i da se ljudima u tim zajednicama garantiraju osnovna ljudska prava.

Dervišević je izrazila uvjerenje da se mir ne može postići bez socijalne pravde. Ravnopravnost spolova i socijalna uključenost nisu sporedna pitanja o kojima treba raspravljati u mirnim vremenima, već pokretači mira, ocijenila je Dervišević i dodala da nema održivog razvoja bez jednakih mogućnosti i prava na život za sve.

„Mediteran ne smije biti definiran svojim granicama, zidovima ili kolektivnom šutnjom pred tragedijom i podjelama. Mora postati prostor dijaloga, razvoja i nade, gdje naša zajednička humanost vodi našu zajedničku budućnost“, poručila je Dervišević.

Na sjednici Komiteta usvojene su preporuke u kojima su sve države članice PSUzM-a pozvane da jačaju regionalne okvire saradnje koji povezuju ekonomsku integraciju, održive investicije i inovacije kao ključne pokretače stabilnosti, zajedničkog prosperiteta i mira u mediteranskom regionu.

Ovim preporukama države članice PSUzM-a pozvane su da promoviraju slobodu plovidbe i inkluzivnu saradnju u Mediteranu, uprkos zajedničkim izazovima kao što su: ekološka pitanja, klimatske promjene, energija, sigurnost i ilegalne migracije.

SEKRETAR DELEGACIJE

Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Delegaciji PSBiH u PSUzM-u
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol
- Kopija: Ministarstvo vanjskih poslova BiH